

Tauākī whakaako

Koia nei ētahi whakaaro mō te whakamahi i ngā akoranga rorohiko i roto i te akomanga kia tino whaihua ai:

- He mea waihanga tēnei kohinga akoranga rorohiko hei whakauru ki roto i te mahere ako, kua hei whakamahi i tōna kotahi.
- He rauemi tēnei hei tautoko i te mahi a te pouako, i te taha tonu o ngā momo rauemi maha kē atu.
- Me āta kōwhiri ngā akoranga rorohiko kia hāngai tonu ki ngā huarahi ako matatini hei hāpai anō i te mātauranga me ngā pūkenga a te ākonga. E tika ana kia haere tahi me ngā mahi noa o te akomanga i mua, i muri hoki i te whakamahinga o ngā akoranga rorohiko.
- E tino whaihua ai ēnei akoranga rorohiko, me mahi takirua, ā-rōpū rānei ngā ākonga. Mā konei e whai wāhi atu rātou ki te whakawhitiwhiti kōrero, ki te tuku pātai, ki te whakaoti rapanga hoki.
- E aro ana tēnei kohinga akoranga rorohiko ki ngā momo rautaki whakaoti paheko tau. Ko tētahi mahi nui a te pouako, he tuitui i te mahi whakaoti paheko tau ki ngā momo horopaki e taunga ana te ākonga.
- Ko ēnei akoranga rorohiko hei whakaako, hei whakaū i ngā momo rautaki whakaoti paheko tau, engari ko te whāinga matua kia taea e te ākonga ēnei rautaki te whakatutuki i roto anō i ō rātou hinengaro ā tōna wā.
- Ina tonoa te ākonga ki te whakamārama i ngā momo rautaki paheko tau e whāia ana e ia, e pakari anō ai tōna hinengaro. Nō reira me haere tahi te whakaako i ngā momo rautaki me te reo anō i te taha. Kei ngā akoranga rorohiko he tauira whakamāramatanga mō ngā momo rautaki.
- He mea nui te āhua o te whakaako a te pouako. E eke ai te ākonga i te taumata o te mātauranga, me kōunga tonu te āhua o te whakaako, me piki ngā tūmanako a te pouako, a te ākonga me ōna mātua, me āta whakamahi anō hoki ngā rauemi kōunga e tino hāngai ana.
- Mā te whakamahi i ngā momo rauemi pēnei i ngā akoranga rorohiko nei, e huri ai te mahi a te pouako hei kaihāpai, hei kaiārahi, hei hoa ako, kua hei kaiwhakaatu noa i te kaupapa ako. Mā konei e mana ai te ākonga i roto i āna mahi ako, e eke anō ai āna pūkenga ako kia tū ai ia hei ākonga angitū mō te roanga atu o te wā e ora ana ia.

Ko tā ngā akoranga rorohiko nei, he tautoko i ngā mahi whakaako kia tino whaihua ai. Arā:

- mā te pouako anō e whakaraupapa ngā hīkoi ako. E taea ana te hoki whakamuri ki te whakamahi anō i ngā akoranga rorohiko, kia tutuki ai ngā whāinga ako mā ngā ākonga matatini
- mā te ākonga tonu e whakahaere te tere o tana mahi ako, ā, ka whai wāhi anō ia ki te hoki whakamuri ki ētahi o ngā kaupapa ki te whakapakari i a ia anō
- ko ngā akoranga rorohiko nei hei whakaū, hei tautoko, hei whakawhānui i ngā rautaki paheko tau e whakaakona ana
- ka āta ārahina te ākonga i roto i ngā momo rautaki whakaoti paheko tau, ka mōhio wawe ia mēnā kei te tika tana mahi, ka whakatenatena kia tūhura te ākonga i ētahi rautaki paheko tau hou, kia hōhonu hoki te whakaaro o te hinengaro
- ka mau te ākonga ki te āhua o tā ngā akoranga rorohiko whakaatu i ngā kaupapa ako hōhonu
- ka toko ake te whakaaro mā te pouako, mā te ākonga rānei e waihanga ā rātou ake akoranga rorohiko
- he rauemi hei hāpai i te ākonga, māna tonu e hanga te mātauranga i roto anō i tōna hinengaro
- ka whakatauiratia te reo whakamārama i ngā momo rautaki whakaoti paheko tau.